

23. Ita uterque, alter hostes, alter sensus vigilantes, et utrorumque incrementum reprimentes, prosperitatis et ultimæ liberationis studiosi, sui quisque voti compotes facti sunt.

24. RAGHUS vero, æquis oculis omnes res adspiciens, postquam aliquot annos, filio obsequens, peregerat, divina sua meditatione attigit spiritum æternum, ultra tenebras commorantem.

25. RAGHUIDES, patrem e vita abiisse certior factus, postquam diu lacrymas effuderat, ignis cultor, una cum mendicis religiosiis, sine igne supremas ei solvit cærimonias.

26. Atque sacrorum patribus faciendorum gnarus, exsequias illius instituit, unice patris amore motus: etenim qui hac via e vita egrediuntur, liborum a filiis offerendorum haud cupidi sunt.

27. Ille postquam per viros officiorum peritos patrem, summam viam ingressum, haud lugendum imperasset, dolore lenito, arcu intenso mundum suo unius imperio subjecit.

28. Tellus et INDUMATIS invida, virum adeptæ, robore virili eximium, illa gemmarum copiam produxit, hæc filium procreavit fortissimum;

29. Qui, solis instar splendens, gloria sua in decem regionibus celebratus, RÂMÆ pater, viris gnaris sub DASARATHÆ nomine innotuit.

30. AJAS vero rex, cum per *vedarum* studium, per sacrificia et prolem vatibus, Diis et Manibus debita solvisset, solis instar, halone vacui, splendebat.

31. Potentia sua utebatur, ad miseros timore liberandos, magnâ sua scientia, ad sapientes honorandos; non solum opes illius principis, sed etiam virtutes ejus aliorum usui patebant.

32. Is, cives observans, felici prole præditus, olim cum regina ambulavit in sylva, urbi vicina, ut INDRAS, deorum moderator, cum SACHI in *Nandano* horto.

33. Tum NÂRADAS, ut SIVAM, in oceani meridionalis litore *Gokarnæ* commorantem, *vinæ* cantu delectaret, ea via aggressus est, qua sol redit a septentrione.

34. Vehemens ventus, quasi grati odoris cupidine actus, eripuit ei sertum, e floribus non terrestribus nexum, citharæ vertici impositum.